

Veiminz “Sam Roengzmbanj” Angqyangz Coux Bi Moq

惠民“三下乡” 欢乐迎新年

Mboengqgonq, Swcigih “sam roengzmbanj” veiminz fuzvu hozdung youq Lungzswng Gak Cuz Swciyen Lungzciz Cin gawjhengz. Miz 17 aen giheiz danhvei caeuq 5 aen Gveilinz Si danhvei gyoebbaenz vwnzva、gohgi、veiswng “sam roengzmbanj” veiminz fuzvu gunghcozdonz, gonqlaeng bae daengz Lungzswng Gak Cuz Swciyen Lungzciz Cin、Gyanghdij Yangh、Bingzdwngj Yangh、Byauzlij Yangh daengj yangh

ci nem mbanj aenmbanj, guh veiminz fuzvu hozdung. Ngoenzde, Lungzciz Cin gyoengq Yauzcuz beixnuengx dawz aen fungsug conzdungj gyug ceiz angqcoux bi moq Yauzcuz haenx buen daengz gwnz hozdung yienhciegz, dawz gij ceiz rangrwgrwg haenx baen hawj gyoengq bouxhek caeuq gyoengq beixnuengx ndaw mbanj gwn, itheij angqhoh bineix fungsou, maqmuengh binaj aeundaej fungsou. (Sinhvazse)



▲ Gyoengq beixnuengx Yauzcuz Mbanjdaliuj baen ceiz hawj vunzlai gwn.



▲ Gyoengq yenjyenz youq Lungzciz Cin Vwnzva Gvangjangz byaujyienj.

◀ Gyoengq yenjyenz youq Lungzciz Cin Vwnzva Gvangjangz diuq foux caijaz 《Liuz Sanhcej》，ndaej daengz ginzung haenh ndei.

Ningzmingz: Cienzswnj Fwencuengh Vwnzva Maenhndei

宁明：山歌对唱传承优秀文化

1 nyied 21 hauh, Ningzmingz Yen Cwngzcungh Cin Yaudaz Cunh Mbanjbanlungz, gyoengq bouxsai mehmbwk mbanj neix youq laj gorungz gyauejmbanj angqfaengfaeng eu gij fwen gyoengqde gag bien haenx, gij fwen neix aeu “Gvangsijh gyaundeij • swnghdai lajmbanj” guh cawjdaez, danqhaenh seizneix lajmbanj vanzging gyaundeij, vunz ndaw mbanj doxbang huzndei.

Ningzmingz Yen laebdaeb 20 bi aeundaej aen yienh senhein vwnzva daengx guek cwnghauh. Ningzmingz Yen haengjheiq cienzswnj vwnzva fwen Bouxcuengh, fwen Bouxcuengh youq Ningzmingz gaenq miz geij bak bi nanz lo. Dangqnaj, aen yienh neix miz 30 lai aen doihfwen, miz 80 lai aen mbanj miz “ciet fwenbo”, miz 1200 lai boux canghfwen ciengzseiz camgya eu fwen byaujyenj roxaeuz eu fwen doxdax, sawj minzsuz vwnzva maenhndei Bouxcuengh ndaej le fazyangz caeuq cienzswnj. (Cauh Yi zcouh/周贻刚)



▲ Gyoengq canghfwen youq laj gorungz eu fwen.

Cauhbingz: Simgyaez Raeujrub Lwgnyez Ndawbya

昭平：爱心温暖山里娃



1 nyied 20 hauh, buek vunz simgyaez Sinhcin Si ndeu daeuj daengz Cauhbingz Yen Vwnzcuz Cin Vwnzcuh Cunh Fuzdwng Fwnhyau, dawz buhndwendoeng、doxgaiq hagsib、sawloih daengj soengq daengz ndaw fwngz gyoengq hagseng, hawj gyoengq hagseng youq ndaw seizdoeng nit neix gamjsouh daengz gij gyaez naekna gyoengq boux simgyaez haenx. Ndaw doz dwg boux gunghcoz yinzyenz dawz gij sawloih gyoengq boux simgyaez soengq hawj haenx fat hawj hagseng.

(Liuz Feih/刘飞)

Denhdwngj: Gujli Ginzung Ndaem Lwgmanh

天等：多举措鼓励群众种植辣椒

Bineix, Denhdwngj Yen mienxngaenz fat cehlwgmanh、laebguh lwgmanh sifan gihti、doigvangq hawj reihlwgmanh yawjnamh boiqfueg dwkbwnh daengj, gujli sonyinx gyoengq ginzung lai ndaem lwgmanh, coicaenh nungzyez demsou. Ndaw doz dwg boux nungzyez gisuzyenz ndaw yienh bae daengz Denhdwngj Cin Mbanjbwzlingz ndaw reih lwgmanh sonyinx nungzminz ungganq dinlwgmanh.

(Vangz Lilanz Lij Siufangh/黄丽兰 李秀芳)

